

ÁR NDUI AR PEDRO

Ár ndui ar he'mi bi 'yot'a ar Pedro

Ar nzengwa

1 Nuga dar Pedro, ár mpotegi ar tsi Hmu Hesukristo. Di ot'ahü nunar he'minu, nu'ahü xka mfonthu ha ma'ra ya hai núnu Mponto, Ngalasia, Nkapadosia, N'asia ne har hai Mbitinia.

²Jö ar Dada xki hwañ'ahü ya maham'u ngu xki beñ'ö, ne bi hñux'ahü nda t'axk'a ri m'uihu ár Hñö Jö. Njap'u da tsä gi 'yothu Jö, ne nda xuk'ahü hár ji ar tsi Hmu Hesukristo. Dá hñus'a ar nhwëki ne ar hogam'ui t'a'ahü.

N'ar döta ndo'mi

³Nsunda Jö ár Dada ar tsi Hmu Hesukristo, togo bi hwëgagihu da m'uhu man'agi. Ne xa di 'withu di to'mhu nö'ö xi ñep'u, ngetho bi mengi bi nte man'agi ar tsi Hmu Hesukristo.

⁴Ne ma ga höñhunu mhets'i n'ar ñho hiñham'u da nhwati, hinto da tsä da jaxt'i, ne hinda tho ár nzátho. Gehnu xi t'egagihunu.

⁵Ár ts'edi Jö faxa ma ñ'emuihu ga höñhu nunar mpohö xi t'egagihu, ne da t'aju ha ya ngöxapa.

⁶Ne go gehyu ja'ahü gi njohyahu, mödi 'ra ya tsi pa gi thohu ya nt'utsa, nu'mu njap'u handa xiñho ar tsi Dada.

⁷Ne njap'u da ts'at'a ri ñ'emuihu, töta ár ñho ar k'axt'abojö t'ent'a har tsibi, ne da 'we gatho nö'ö hingi ho, mödi ma da thotho. Ha nuna ri jamfihunu ma da t'e'spa ár nsu, ne da nhumañho xta ep'u ar tsi Hmu Hesukristo.

⁸Hinxka hyanthu ha gi möhu, ne gi ñ'emuihu mödi hingi hanthupya. Nunar jamfinu ja'ahü gi pe'su n'ar johya xa nzátho, hingi tsä ga möñhu tengu'ö.

⁹Ne gi tsuhu ar mpohö, gehnu gi ñ'emuihu gi tsuhu.

¹⁰Nuyá m'ehni Jö bi ñ'ani ne bi hñet'u tema ndi bonga nunar mpohö xki ñhöt'ahü, ne bi möñ'u nunar nhwëkinu xki t'ek'ahü.

¹¹Mi het'u xiñho togo ne ham'u ma nda tho nö'ö xki xipa ár Hñö ar tsi Hmu Hesukristo mi pes'u. Gehnu mi xip'u tema ugi ma nda tho'ö, ne ya döta njöpi nda e m'efa.

¹²Xki t'utwabi'u nehe hinge nda zu nuya ñhoyu, go ma nda zuju. Nö'ö mi möñ'u maham'u, xi xi'ahupya

nu'u togo hōmpa ár ts'edi ár Hñö Jö, gehnu xpa e mhets'i. Gathoyu nemhö da bö xiñho ya enxe.

Ts'ónkagihu ga 'buhü n'ar m'ui xint'axi

¹³Jange umba ri muihu gi pöhu tema gi pehu. Da xo ri dahü, ne gi to'mthohü ar nhwëki ma da hö ma tsi Hmuhu Hesukristo xta ehe.

¹⁴Nupya gar bötsi'ihu Jö gi ohu gatho nö'ö nsi'ahu. Jange yo gi nehu nuya ts'oki ngi othu maham'u nú'mu hinge ngi pöhu ngi 'yothu ar ñho.

¹⁵Jangu nö'ö togo bi zoñ'ahu xint'axi ár m'ui, gi njahup'u n'ehe, dár nt'axi gatho nö'ö gi 'yothu.

¹⁶Ngetho njanu xi mönga Jö har T'ofó: Dár nt'axi ri m'uihu nguga xint'axigi.

¹⁷Ha nu'mu gi ndöñhu ngu ri Dadahu togo ot'a ar hoga ts'ut'wi, umba ngu xi 'yot'a n'a ngu n'a, ne hinge hwantho; jange ntsuñhu hanja gi 'yohu gatho ya pa gi nehu ar 'ñu di ma mhets'i.

¹⁸Ngetho bi njuk'ahu har m'ui hinte mar ñho bi zok'a ri dadahu. Ha nunar njut'i bi t'uni bi ts'iñ'ahu, hinge ngu nö'ö thege, ngu ar k'axt'i wa ar t'axbojö.

¹⁹Gese ár ji ar tsi Hmu Hesukristo bi nö'mi, ngu n'ar tsi deti t'unga ngu ar m'oñho, xa 'bui xiñho ne hingar ts'onte.

²⁰Jö xki benga nda 'yot'a njap'u nú'mu hinxki hyokta ar ximhai, ne ka xi nheki nuya payu homp'a ri ñhohu.

²¹Ne nuna ar ugi bi tho ar tsi Hmu Hesukristo, bi ja'ahu gi ñ'emuihu Jö, togo bi ko'spa ár te ne xi umba n'ar döta nsunda. Njap'u gi

ñ'emuihu Jö, ne gi to'mbabihu ár mfats'i.

²²Xi t'axka ri muihu gi othu nö'ö majöni, ne ár Hñö Jö fax'ahu gi pe'su ar hoga mhöte hindi oxta mañö. Jange mhöhu n'a ngu n'a. Nunar mhötenü di 'ñe ha n'ar hogamui xint'axi.

²³Ngetho xka penju xka m'uhu man'agi. Hinge xka 'ñehupya ha n'a di the ár te. Xka poñhu ha n'a hinge the ár te, nú'mu ga pöthwu ár mhö Jö hö ar te ne hiñham'u da thege.

²⁴Ngetho hár T'ofó Jö enö njawa: Gatho ya jö'i ñehewi ya doni, ne ár nsu ngu ár ndoni.

Xta 'yot'a ar doni da da ár ndoni.

²⁵Ha nunár mhö Jö hiñham'u da thege.

Gehnu ar hoga mhö xi nsi'ahu.

2 Jange hyehu n'agitho gatho ya ts'oki, ya nhemñö, nö'ö gi yot'a ri hmihu, ya hyokte, ne ya 'yonga 'bede.

²Xa gi hyoñhu ngu n'ar tsi t'ulo bötsi ar 'ba di 'ñe mhets'i hinte xi nthönts'i. Njap'u gi tehu xiñho ne gi pe'su ar mpohó.

³'Yothu njap'u ngetho xka pöthwu ár nhwëki ar tsi Hmu.

Ar tsi Hmu Hesukristo ngu n'ar do pe'sa ar te

⁴Kwathu gi hyoñhu ar tsi Hmu Hesukristo, togo ngu n'ar do pe'sa ar te. Mödi nunar donu bi zanda nu'u togo mi ho ar ngu, ha Jö go bi hyandi ngu n'ar do xi thahni ne nzatho.

⁵Gi njahup'u n'ehe, di hñöx'ahu ar do hö ar te, n'a ngu n'a gi jafu da he'sa ár nijö Jö. Ne di hñöx'ahu ar möjö pe'sa n'ar m'ui xint'axi,

gi ent'a ri tehü ngu n'ar m'oñho
numaño Jö, gi hömfu ár ts'edi ar
tsi Hmu Hesukristo.

⁶Jange enga har T'ofó:

Pöhu di exnu Nsion ar mudido
dü'ma ar jödo xi thahni
nzatho.

Nu'u togo da ñ'emui, hinda
ma da 'be ár tsa.

⁷Jange nu'ahu xka ñ'emuihu, gi
hanthu nzatho'ö. Ha nu'u togo
hinxi ñ'emui, ngu enga har T'ofó:

Nunar do bi zanda ya hongu,
nupya ar mudido dü'mba ár
jödo ar ngu.

⁸Ne enö n'ehe:

Gehnu ar do da japi da fe'sa yá
wa ne da hwangi.

Ngetho nthewi ar mfets'e hár mhö
Jö, gehyu ya me'sku. Njap'u xki
thuts'i nda njap'u'u.

Ár hnini Jö

⁹Ha nu'ahu yá bötsi'ihu Jö xi
hwañ'ahu, yá möjö'ihu ar ndö
mhets'i. Go ge'ahu ár hnini Jö 'bu
xint'axi, ne ár meti'ihu'ö. Gese'ö
bi hwañ'ahu gi xifu ma'ra tengu
ár ts'edi ne ár nsunda nö'ö togo bi
zo'ahu ngi poñhu har 'bexui, ne gi
'buhupya har hoga hyats'i xa nzatho.

¹⁰Maham'u hinge ngar hnini'ihu
Jö, ha nupya hö, yá hnini'ihu'ö.
Maham'u hinge ngi pe'sfu ár
nhwëki'ö, ha nupya hö, xka hñömfu
ár nhwëki.

'Buhu ngu yá 'bego'ihu Jö

¹¹Tsi kuhu, di zo'ahu ngu ya nzohö
ne ngu ya ne'ñu. Di xi'ahu gi hyehu
nuya te gatho ne ri ndo'yohu, gehyu
ntoxkwi nö'ö ne ri muihu.

¹²'Buhu n'ar hogam'ui madedá
nu'u togo hinxi jamfi, mödi 'yomp'a
ri 'bedehu eñ'u xi nts'otho nö'ö
gi othu. Ne xta ep'u ar tsi Hmu
Hesukristo, ma da nsundabi Jö xta
xo yá da, da bö'u mar ñho nö'ö ngi
othu.

¹³Ngetho gi jamfihu ar tsi Hmu,
'yothu gatho nu'u togo pe'sa n'ar
nsu. 'Yothu ar ndö xi t'exa mañö,

¹⁴ne gatho yá maxte, ngetho xi
m'ehni da umbya mfe'i ya ts'okte,
ne da ñe'spa yá nsu nu'u ot'a xiñho.

¹⁵Ne Jö gi 'yothu xiñho, ne njap'u
gi kothwu yá ne nu'u ya jö'i hingi
numaño nö'ö di pehu.

¹⁶'Buhu wande hinto su'ahu, hönse
hingi jahu gi ne gi 'yothu nö'ö hingi
ho. 'Yohu ngu yá 'bego'ihu ar tsi
Dada.

¹⁷Ñe'sfu ár nsu gatho. Möhu ya
tsi ku. Tsufu Jö. Ñe'sfu ár nsu ar
ndö n'ehe.

¹⁸'Bego'u, pe'su n'ar hogamui gi
'yothu ri hmuhu. Hinge hönse nu'u
togo ya hogajö'i, 'yothu nu'u xi
ñhembu gi tsethu n'ehe.

¹⁹Jö handa xiñho nu'u tho ya mfe'i
hindi ñepabi, nuya thogi tseti, ot'e
da gohwi xiñho Jö.

²⁰Tema ñho gi juu nu'mu gi tsethu
ar mfe'i ngetho xka nts'ojü. Ha
nu'mu gi thohu ar mfe'i ngetho gi
othu nö'ö xiñho, njap'u hö, hant'ahu
xiñho Jö.

²¹Xi ts'oñ'ahu gi tsethu; ngetho ar
tsi Hmu Hesukristo go bi tho'ö ya
thogi ma nga thohuhmö, ne njap'u
bi utkagihu ár m'ui ga tēñhu.

²²Nö'ö hinte ma ts'oki bi 'yot'e,
ne hinte mar nhemhñö bi bonga
hár ne.

²³Núm'u mi ts'ani, himi ko'sa ar nts'ani. Núm'u mi tho ya ugi, hinge mi xipabi nda njapabip'u n'ehe. Mi tsokwa gatho hár 'ye nǒ'ǒ togo ot'a ar hoga ts'ut'wi.

²⁴Gese bi hñöska ma ts'okihu hár ndo'yo nú'mu mi ts'uta har pont'i, ne njap'u nu'u di 'buhu, hinte tsá te da jaju ar ts'oki. Nupya ga 'buhu ga othu nǒ'ǒ xiñho. Bi tho ar ugi'ǒ, ne njap'u gi pe'su ar nzaki.

²⁵Ngetho ngi ñhehwihu 'ra ya tsi deti xki mfont'i, ha nupya xka penju xka tsuhu ar ma'yo su'a ri tehu.

Hanja da m'u ya nthöti

3 Di zo'ahu nu'ahu gar 'behñöhu n'ehe, gi 'yothu ri dömehu, ne njap'u nu'mu togo hinxi ñ'emui, da hñönga ár mhö Jö hant'ahu ri hogam'uihu, hinge mahyoni gi zohu.

²Honse da hyant'a ri hogam'uihu xint'axi ne gi tsufu Jö.

³Nuna ri ñhokihu, hinge xa gi hyoñhu nǒ'ǒ oxta mañö xa di thotho gi ñhoju. Yo xa gi ñhoxu ya hwexkabojo, ne hingi hyehu ya he gi ñ'exu.

⁴Hyoñhu nǒ'ǒ di ñe mbo ri muihu. Nunar ñhokinu hiñham'u da thege. Gi umba ri muihu gi 'buhu n'ar hogam'ui, ne gi 'yothwu ar ñho ma'ra. Gehnu numañho Jö.

⁵Ngetho njap'u mi ñhoka maham'u nu'u ya tsi 'behñö mi 'bu n'ar m'ui xint'axi. Ne mi to'mba ár mfats'i Jö, mi ota gatho nǒ'ǒ mi xipa yá döme.

⁶Jangu ar Sara mi ota ar Abra, ne mi embabi ár hmu. Ha nu'ahu xka ehü di boni yá t'inxu'ihu, nu'mu gi 'yothu ar ñho ne hiñ'otho te gi tsuhu.

⁷Di zo'ahupya nu'ahu gar dömehu, 'buhwihu ri 'behñöhu gi pe'su n'ar döta mfödi, ne gi umfu ar nsu di 'ñepi, ngetho hints'u nzeze yá ts'edi. Beñhu gehnu ri ñ'owihu gi hñöngwi mahyegi yá njöpi Jö, ne njap'u hinte di ja te da k'a'sa da t'a'ahu nǒ'ǒ gi afu Jö.

Hanja da m'u gatho ya ku

⁸Hár ngöts'i di xi'ahu gi beñhu n'adar mfeni, di ko ri muihu gi mhöhu ngu ya tsi ku, gi pe'su ar nhwéki ne gi ntsixkwihu gatho.

⁹Yo gi ko'spabihu yá ñöni togo ot'ahu ar ts'oki, ne hingi ntsants'aniwi ma'ra. Nǒ'ǒ gi 'yothu, tetwathohu Jö, ngetho xi ts'oñ'ahu da t'a'ahu ar njöpi.

¹⁰Ngetho ngu enga har T'ofu: Nǒ'ǒ togo ne da mö ár te, ne da hyanda ya hoga pa, hinda hye ár ne da mönga nǒ'ǒ hingi ho, ne hinda hyegi da mönga ya nhemñö.

¹¹Dá hye ar ts'oki ne da 'yot'a nǒ'ǒ xiñho. Da hyonga ar hogam'ui, ne xta dini hinda hyegi.

¹²Ngetho ar tsi Hmu handa xiñho nu'u pe'sa n'ar m'ui xint'axi, ne oxta to'mi tema da 'yapabi. Ne 'butho da umba yá mfe'i nu'u togo hingi ot'a xiñho n'ehe.

¹³Ha nu'mu gi othu nǒ'ǒ xiñho, togo tsá te da ja'ahu 'mu.

¹⁴Ne nu'mu ja te da nja'ahu ngetho gi othu xiñho, nzatho'ö. Yo gi jafumasu ne da pi'ahu, ne hingi tu ri muihu.

¹⁵Nǒ'ǒ gi pehu, nsundahu Jö ar tsi Hmu ha ri muihu. Ne hyax'mu

gi 'buhū xka ñhojū gi thōthū,
hingi ñ'exū ne di 'bēnga nt'ek'ei
nu'u togo añ'ahū teme di bōnga ri
ndō'mihū gi pē'sū.

¹⁶Buhū hinte di tsu'a ri mfenihū.
Ne njap'u nu'u jus'ahū ri 'bedehū
enō gar ts'oktehū, da 'bē yá tsā xta
nu hingi njap'u. Xta nu'ahū gi pē'sū
n'ar hogam'ui, ngetho gi 'būhwihū
ar tsi Hmu Hesukristo.

¹⁷Xiñhō'ō nu'mū gi thohū ya thogi
ngetho gi othū nō'ō xiñho, nu'mū
njap'u ne ar tsi Hmu, hinge gi thohū
ya thogi ngetho gi othū ya ts'oki.

¹⁸Nunar tsi Hmu Hesukristo bi
tho n'agitho ar ndōte, njap'u bi
hñōga ma ts'okihū. Ar hogajō'i bi
unga ár te bi pokagihū nuju xta othū
ya ts'oki, ne da zixkagihū ma ga
'būhwihū Jō. Majōni bi du ár ndo'yo,
ha nu ár hñō himbi du, pontho
bi mengi bi nte nú'mū mi nanga
man'agi ár ndo'yo.

¹⁹Nunár hñō bi ma ba humbyá
hmi nu'u yá hñō ya jō'i bi jot'i.

²⁰Nu'u maham'u himbi ne bi
'yode, hangū bi dō'mahmō Jō, gatho
ya pa bi zi'spa ar Noe bi hyoka ar
motsa. Himbi k'ont'a nzeye ya jō'i,
hōñse hñōto bi bongi nda jōt'a har
dehe.

²¹Nunar dehenū bi ñu'sa ar
ximhai, ñehēwi ar xixthe nuya
payū. Nunar xixthenū, hinge di
nehū ga xujū ma ndo'yohū. Gehnū
n'ar nt'udi di uñhū hár nthandi
Jō hinte tsuka ma mfenihū, ne
xta mpohū. Gathonū xta hññhū
ngetho bi mengi bi nte ar tsi Hmu
Hesukristo.

²²Gehnū mi wadi bi boxa mhets'i,
bi hñuxa hár ñ'ei Jō. Ne gatho ya

enxe, ya ndō ne ya ts'ut'wi ota nō'ō
mōñ'ō.

Ngu yá hoga 'bego'ihū Jō, jafu da
mpe ya hogant'uni xi 'ra'ahū Jō

4 Ar tsi Hmu Hesukristo bi
zeta nuya thogiyū hár ndo'yo,
jange pē'sū nunar mfeninū n'ehe.
Ngetho nu'u togo xi tho ya ūgi hár
ndo'yo, xi ñ'ehwi ar ts'oki.

²Nuya pa xi 'ñep'u hinda m'u
ngu nese, temtho yá ts'onhe ya
meximhai. Nupya da 'yot'a gatho
ngu ne Jō.

³Hyehup'u nō'ō ngi othū mi
numaño nu'u hingya gamfi. Nu'u
'bengwi ya jō'i, te gatho ne'u, xa
ya nti, xa ne da 'bē yá mfeni ha ya
dango, ne ndōnga ya tsita emp'ō, xa
xi nts'otho nō'ō ot'u.

⁴Nuyū 'yotho hingi ñ'owihū ha yá
ts'o'bēfi, ne theñ'ahū.

⁵Ha ma da datwa majōni nō'ō
togo xi ñhoki da umbyá mfeī nu'u
te, ne nu'u xi du.

⁶Jange xi nsipabi ar hoga mhō
nu'u togo xi dupya, ne da tsā da
m'u'u ngu ar hñō di hñōxkwi Jō,
mōdi bi hñōnga ar ndōte ngu ar
njut'i ar ts'oki tho gatho ya jō'i.

⁷Nō'ō ar pa da gōxa xoge,
'bap'utho da zohō. Jange hyanthū
xiñho tema gi pēhū, ne ndō'mhū
hingi tsayāhū gi zohū Jō.

⁸Ne gi umba ri muihū m'et'o xa
gi mhōhū n'a ngu n'a, ngetho ar
mhōte punga nzeye ya ts'oki.

⁹Gi nethohū gi uñhū ar tsaya n'a
ngu n'a.

¹⁰Ngu yá hoga 'bego'ihū xi
t'ent'a ha ri 'yēhū nuya nzeye ya
hogant'uni unga Jō, jafu da mpe

ha yá m'ui ma'ra ngu ar nt'uni xi nhwëk'ahu.

¹¹Nu'mu ja n'a togo ñö, dá ñö ngu mönga ár mhö Jö. Ha nu'mu ja n'a togo pepa ma'ra, dá 'yot'e ngu ár döta ár ts'edi Jö xi thembabi. Ne njap'u gatho nö'ö gi pëhu da nsundabi Jö, ngetho gi pëfu ar tsi Hmu Hesukristo. Jö ár meti ar nsunda ne ar ts'ut'wi hiñham'u da göts'i. Dá njap'u.

Di thohu ya thogi ngetho dar gamfihu

¹²Ma tsi hmöka kuhu, yo gi tu ri muihu nu'mu xta ep'u ya thogi, ne da zu'ahu ngu n'ar tsibi da tsat'ahu ri ñ'emuihu. Yo ma gi 'yohu xta ep'u gathoyu.

¹³Nö'ö gi 'yothu, njohyahu ngetho gi thohu n'a tsi tui ya ugi ngu bi tho ar tsi Hmu Hesukristo, ne nú'mu xta nheki ár nsunda xa ma gi njohyahu.

¹⁴Nu'mu nt'utsa'ihu ngetho gi teñhu ar tsi Hmu Hesukristo, xa nzatho'ö, njap'u nheki gi 'buhwihu ár Hñö Jö. Majöni nu'u tsani, ha nu'ahu gi nsundabihu ha ri m'uihu.

¹⁵Yo ma gi thohu ya thogi ngetho gar hyotehu, gar bëhu, gar ts'oktehu, wa gi ñ'öxtehu tengu yá m'ui ma'ra.

¹⁶Ha nu'mu gi thohu ya thogi ngetho xka ñ'emuihu, yo ma gi ntshahu. Nsundabihu Jö gi thohuyu.

¹⁷Ngetho bi zo ar pa da nja ár mfei Jö, ne ma da du'ma m'et'o hár nijö. Ha nu'mu xi ndui xi gutka ma guhu, tema ngöts'i to'ma nu'u hinxi ñ'emui ár hoga mhö Jö.

¹⁸Ne enga har T'ofu n'ehe:

Nu'mu xa xi ñhembu da mpoho n'ar hogajö'i,

habu di gohmö nö'ö hingi benga Jö, ne ar ts'okte 'mu.

¹⁹Jange nu'u togo gi thohu ya thogi ngu ne Jö, 'yent'athohu ri tehu ha yá 'ye ar tsi Dada togo bi hyogagihu, ne xa gi umba ri muihu gi 'yothu ar ñho.

Sufu yá tsi deti Jö

5 Di zo nu'u ya ndö har nijö gi 'buhwihup'u. Di apabiga dar ndöse n'ehe, ne da handwa yá ugi bi tho ar tsi Hmu Hesukristo, ne di to'mi ga 'bu'benu mhets'i xta nheki ár nsunda.

²Suhu ya tsi deti gi 'buhwihup'u yá meti ar tsi Hmu. Yo gi othu ngetho nja'ahu, go gi nesehu. Yo gi homfu yá bojö, njohya gi suhu.

³Hingi 'yothu ndöta gi ne gi hyomahaihu nu'u togo gi suhu. Nö'ö gi 'yothu, 'ñuhu n'ar hogam'ui.

⁴Ne xta ep'u ar Döngama'yo, ma gi hñöñhu ar nthöhö nsunda hinda ma da thege.

⁵Mahyegi di xi'ahu nu'ahu gi bötsihu, 'yothu te da xi'ahu ya ndö har nijö. Gatho'ihu ñ'othu n'a ngu n'a, ne di nhekitho ri hogamuihu, ngetho:

Jö ntoxkwi nu'u ya ñ'exte, ne hwëkwa ár mfats'i nu'u hingya ñ'ets'i.

⁶Nts'a'mhu hár nthandi Jö togo xa ja ár ts'edi, ne go da 'ñes'ahu ri nsuhu nú'mu xta zonga ar pa xi beñ'ö.

⁷Tsokwabihu Jö gatho ri dumuihu, nö'ö hingi tsaya su'ahu.

⁸Zot'a xiñho ri dahu ne yo gi othu, ngetho ri ñ'unihu ar ts'ondöhi 'yo ngu n'ar 'muhu honi togo da 'yent'a ár ne.

⁹Noxju gi to'spabihü xi nze ri jamfihü. Gi pöhu nuya thogiyü, bí thopya nze ye ya ku xoge ár nxidi ar ximhai.

¹⁰Ne Jö togo ár meti ar nhwëki, bi zokagihü ga 'buhü hár nsunda hingi thege, ngetho di teñhü ar tsi Hmu Hesukristo. Nu xta tho 'ra ya tsi pa gi thohü ya thogi, gese'ö da max'ahü gi 'buhü n'ar m'ui xint'axi, da zet'a ri jamfihü, da 'ra'ahü ar ts'edi, ne da zix'ahü xiñho hár 'ñu'ö.

¹¹Jö go ár meti'ö ar nsunda ne ar ts'ut'wi hiñham'u da göts'i. Dá njap'u.

Ya ngöxanzengwa

¹²Di peñ'ahü nunar he'minu da hñös'ahü ar ku Silbano, togo di handi n'ar ku ota xiñho ar tsi Hmu. Xta ot'ahü n'a tsi tui, di ne ga hup'a ri muihü, ne di damajöni gehnu ár nhwëki Jö nö'ö gi teñhü.

¹³Ar nijö 'bü Mbabelonia, mahyegi ngu'ahü xi hwahna Jö, peñ'ahü ar nzengwa n'ehe. Ar ku Mörko togo pontho ma t'u zengwa'ihü n'ehe.

¹⁴Nzengwahü n'a ngu n'a xa gi mhötehi. Gi 'buhü n'ar hogam'ui gatho nu'ahü xka nthexü ar tsi Hmu Hesukristo. Dá njap'u.